

## SERPÊHATIYA

# CIWAN Û KEJÊ

Di wextê Kevin de ,heyamê berê  
Li bajarê Amed hebû yek merî

Bi navê Ciwan ew bi nav û deng  
Xwedî gurz û mertal û şûr û tifeng

Nêçîrvanê wehş û teba bû Ciwan  
Li çol û çiya bû bi roj û şevan

Ne dibhîst tu deng,bil ji yêd bilbilan  
Dikir geşt û seyran di nêv sorgulan

Vexwarina wî her dem ji avên zelal  
 Ê xwarin ji goştê kewan û xezal

Ewî ha ji bayê felek qet nebû  
 Bi şahî û xweşbû di gel xem nebû

Mixabin nekir dom bi wî re felek  
 Ji nişkave lê wergerandî kelek

Ketî nîva perwane û lengeran  
 Serê wî kete qal û baled giran

Ji mervêd Kevin min bihîst bê gûman  
 Bi vî reng û hawî we gotî Ciwan

## **Destpêk**

Bihar e, hemî koh û deşt û zinar  
 Newal û nehêl çî sirt û pesar

Çî Kendal û berpâl û kortal û dir  
 Zerîb û diyar û çîmen hem jî gir

Weha renga panav û lat tev de hişîn  
 Ji gul, çîçek û nêrgiz û yasemîn

Binefş û qewan û rehana du pel  
Qedîf û sîmen,berbiroj û nefel

Êvarê li bane dibit ewreav  
Li rû gul-giya jê dibare xunav

Tîrêjên di rojê xwe davêjne ser  
Kulîlk û giya tev diçrisin li ber

Çivîk û quling,bilbil û endelîb  
Di gel hev dinalin bi dengêd xerîb

Şelûr û kevok,tîtî û bazbelek  
Dikin geşt û seyran bi perwaz û lek

Ji sib ta bi êvar,ji şeb ta seher  
Di nav gul-giyan ew dikin ceng û şer

Heyamê me bûrî li çol û çiyar  
Li nêçîra wehş û teba koviyan

Çi binvîse Yezdan li enya mirî  
Nîne jêre çare wê bête serî

Sibê min tîfinga xwe avête mil  
Nêçîra pezê kovî,min kirye dil

Demek ez digeryam li çol û çîyan  
Li war û guhêr û cihê koviyan

Diwestim, rûniştim li ser tehtekê  
Ji nişka min dî ku li ber latekê

Beranek ji kovî li wê der mexel  
Berê wî li tahta ku ez lê di gel

Hêdî rûdiniştim li ser çoge ling  
Ji milê xwe anîbû xwar min tîfing

Deqa enyê min ji xwer kir hedef  
Cobarên xwînê min dî derbûn ji dev

Demek pir neçû wî birîn bûye sar  
Ji lata bilind ew beran hate xwar

Hêdî ez dihatim min rahişte ling  
Min besta bi bend ew bi darê tîfing

Bi kêf û xweşî min beran birye mal  
Mixabin nizanî me dawî çî hal

Dema leşkerê reş xuyabû ji şerq  
Sîpahêd royê ku ji ber bûn du şeq

Demek şer kirin, xwîn meşî rengê zab

Wekî cenga Ristem û Efrasiyab

Ji her herdu cihan laş ketin bê jimar  
Sipahêd royê bûn ji hev tar û mar

Şahê roj esîr kirne, girtin bi dest  
Sîpahêd royê tev ji ber wan şikest

Şahê reş dibû padîşahê cîhan  
Û loksê xwe danîn di nêv asîman

Serê xwe min danî ji westa gerê  
Di xew de min qîzek didî wek çirê

Tilî, dest ji mûm in û neynûk sedef  
Bejin orte ye, ten sipî rengê berf

Çilakî ye poz wek bilûra şivan  
Awir çav ji tîrin û ebrû kevan

Enî fenere, dêm ji sêvê Xelat  
Şekirlêv ji kaniya der ava heyat

Diran wek birinc e û dev xuncegul  
Kohê Hewlêr û Cûdî ne herdû mil

Û sîng deşte, tê de bihiştî Îrem  
Deqek lê wekî kevirê beyta herem

Û gerden ji came, mewîj têd xuya  
Beden baxê Berzan e,ber nû giya

Ji pesnê wê sêsed ziman lal dibî  
Ji nîva wê nehsed ciwan kal dibî

Bi ber min ve hat go:ey bê mecal  
Ji bo çi te kuşt ew beranê şepal

Wê awirek li min da bi kêf û ken  
Got:ev heyf û tola beranê reben

Ku seltem seraser ji min dil revand  
Wekî şêxê Sen'an min Tîles çirand

Kirim bend û reswa didam ber şegan  
Kirim ez şivanê beraz û segan

Min destê xwe avête dawa kiras  
Bi hêvî min gotê:bi min xwe binas

Bi lavlav û dîlek bi hêvî û tewq  
Ku destê xwe kirbû li gerden me tewq

Di xew de gelek tewqe kirbû min jê  
Heta gote min,ez bi navê Kejê

Dia min bi navê Perîşan bizan  
Keleş hem min bav e gelek mihrevan

Li ba ket ji cem min bi derket meşî  
Kire laş û canê mî hezar naxweşî

Sibê ku şiyar bûm ji xew qet ne dî  
Ne kûs û ne kes, ne keça Amedî

Wekî dîn û hara helestim piya  
Ku dengê min guh kirne bav û diyan

Bi ber min bezîne çî bav û çî da  
Diya min digot: can ji bo te feda

Hinav û dilê dê bi gorî çî ye  
Ji xewna çî xewn e, te îşev diye

Wekî ku min dî bû ji wêr e min got  
Got: bes ey Ciwan te dilê ca xwe sot

Diya min li nik min dima dil bi xem  
Min nalîn e, roj û şeva rengê Mem

Mehek ez dimam bê tebat û hedan  
Ne xwarin û vexwarin ji êşa di can

Ku xwarin ji bo min evîn û keder

Vexwarin ji bo min fîxan û keser

Sawêra Kejê ye, min razan û xew  
Me nalîne dengbêj û sazê me tew

Li min deq di rojin û sa'et min meh  
Nema sax di laş de min yek cih û reh

Ku rojek ji rojan li ber der dijîm  
Serê min di ber min de dihejîm

Serê xwe ku hildim min pîrek didî  
Gelek bûme jê şermîsar û fedî

Çekê lê bi carek hemî kesk û şîn  
Ji pîrê diçe sed hezar bex û bîn

Li jora serî,yek tebeq tev de mişt  
Ji her dar û derman,ji her reng û tişt

Ji gorê mezel,Calînûs hate der  
Eflatûn nizane li ber yek xeber

Arîsto û Soqrat û Beqrat temam  
Ji ber ve hemî suxte ne hem xulam

Ku Harût û Marût ji sêhra giran  
Bi xwendin û ders dane pîra zeman



Di ber paxilê da heye yek text remal  
Wekî suxteyek jê nebî Daniyal

Ku ew pîr ji mir bû wekî Heyzebûn  
Rijand textremlek li ser cîm û nûn

Piyamek dixwendî li birca Merîx  
Ji wê textremlê xuyabûn du mîx

Pîrê zivirî gote min:ey Ciwan  
Ku xewna te pêk ve ji min bû xuyan

Ey dil kuştîyê awirê çavên reş  
Te dîlber Kejê ye,keça mîr Keleş

Dê bêj me te peyva ji te ku me hişt  
Bela te ji beranê kovî ku te kuşt

Bi navê xwedanê hemî ins û cin  
Gihiştî xwe vêga bixwaze ji min

Divê ku li ber min tu bindeste bî  
Çi bêjim te îro tu dest beste bî

De zû rabe ser xwe bide pey min meş  
Bî kêf û xweşî hem di gel madê geş

Dema pîrê gote Ciwan ev sûxen  
Devî wî nema hate hevdu ji ken

Mijûlya pîrê ma ye pesnê xweda  
Ciwan daye dû wek xulam û geda

Ku xocê Xidir çûye ava heyat  
Di gel wî Sikender cihê rojhilat

Dema çûne nêzîka mala Keleş  
Pîrê zîvirî ser Ciwanê nexweş

Weha renge pîrê digot ey Ciwan  
Got:palved xwe bê hiş bixe bê ziman

Xwe avête qadê Ciwan wek mirî  
Pîrê ma li ser wî bi şîn û girî

Bi nalîn û fîxan û qîr û hawar  
Gelek xelq bi ser wan ve hatine xwar

Li ser cendekê wî dibû berbere  
Gelek por li ser wî diçûne pere

Kejê hate ser lê nerî nas dikir  
Berî daye pîrê,ew pirs jê dikir

Pîrê got:ji lawan min ev kur heye

Mehê tadîger wî dil êşek heyê

Ji rojan îro derketin em ji mal  
Ji bo dîtina te û diya te me bal

Kurê min li pêy min,min dît kir hewar  
Dema zîvirîm ne ziman û ne zar

Kejê gote pîrê de fermo were  
Ku rahêjne wî em di nava xwe re

Di nav xwer ku anîne mala Keleş  
Lihêf dane ser wî di gel tejkî reş

Demek çû hılanîn ji ser wî livîn  
Reşandin li rûyê wî çî avek bi bîn

Piyalek bîhok û sêva dane dest  
Vexwar û ji nû ve ku rabû helest

Pîrê rabû derket ji cem herdiwan  
Kejê ma tenê lê di gel bes Ciwan

Şêrîn gote Ferhad:eya safînêt  
Bizane me qaşa nigîna te mêt

Di pey te Ciwan qet min navê tu jîn  
Wekî Mem mirî ku li pey çuye Zîn

Ciwan rabû ser xwe di girt destnimêj  
Bi kurtî dibêjim qe nakim dirêj

Temam kir û rabûye ser qametê  
Ciwan rast berê xwe dida qibletê

Temam kir nimêj ku ferz bû li ser  
Di pey hat tewafa ku Eswed Hecer

Ku destê xwe kir paxila sor û zer  
Du sêvên xelatê jê anîne der

Wî ew sêv dimêtin rewa têd nehişt  
Bê hiş ketye qadê Kejê ma li pişt

Pîrê hat bi ser ve nerî dil bi kul  
Bê hiş lê reşandî hinek avegul

Bi destê wî girt û berî daye mal  
Dilê wî Kejê girt û maye li bal

Dema hate mal qet ne bû lê tebat  
Rondik tene xwarê ji rengê Firat

Ku Seyhûn û Ceyhûn û Xabûr û Zab  
Ji kaniyên çavên wî derbûne ab

Li wî roj meh in ,şev li wî bûne sal  
Bi ax û girî geh bi fîxan û nal

Ku rojek ji rojan li mal dil bi xem  
Dijî pîrê تنها ji der hate cem

Silav kir li wî daye dest reşbelek  
Bi wê xweş piyamê dibû şa gelek

Ku Fîrewn, Mûsa şand ji dêra Xelat  
Ku ya kincê Yûsif ji Yaqûb re hat

Berî daye pîrê got: gelkî bi xêr  
De fermo keremke ji ter pêncî zêr

Li ber xwe vekir reşbelek wî dixwend  
Ku tê de nivîsandiye ev du bend

Silvêm li te pir gelek ey Ciwan  
Bi gorî te bim her dem û her zeman

Ke Yûsif çî zû te kirim ez ji bîr  
Zileyxa di vîna te de maye kwîr

Bizane ji hev dûriya dost û yar  
Dilê wan ji hevdu gelek dibne sar

Dema tarî ket qadeyê ey Ciwan

Were nik me îşev min da te civan

Êvarê Ciwan lê ku roj çûye xwar  
Li ba ket, berê xwe dida dost û yar

Ji hidir bi der ket Memê jar û dîn  
Berê xwe wî daye sera têde Zîn

Dema hate nik şehneşîna bilind  
Dî ku vêketî tê hezar mûm û find

Dî ku wa li ser textekî zêrnegar  
Dikin rohnî mûm lê ji her çar kenar

Wekî heyva bala ku çarde şevî  
Peravên xwe berdane koh û zevî

Ciwan rengê dêwê sema hîvperest  
Xwe avête ser hîv esîr kir bi dest

Ku parçake ewrê di reş hîv veşirt  
Niha bûye rohnî reşî wa ne girt

Ciwa û Kejê herdu yar û heval  
Di gel hev mijûl bûn ne xem û xiyal

Bi kêf û henek geh bi lewm û girî  
Heya perda şermê ji nav wan çirî

Ku Mecnûn û Leyla gihiştine hev  
 Ji derd û xema re dima bez û rev

Hezar maç didan hev ji dêmên di şeng  
 Heta ku sera wan tije bû ji deng

Mixabin felek xayin e,ey bira  
 Ji kes re ne hişt vêketî tim çira

Keleş pêjinî bû li wan pendegîr  
 Helestî piya dest wî avête şûr

Dema şûr ji kalan dikêşa bi lez  
 Ciwanê reben ma ji bo lez û bez

Bi rev hem bi bez wî berî daye mal  
 Mixabin ewî dil dima nik heval

Keleş hate hundir nedî bil Kejê  
 Got:ka ew mirovê li ba te dijî

Kejê gote,min qet nedî kes li vir  
 Keleş kir ne kir,jê tu tişt she nekir

Bi kezyê Kejê girt û da ber nigan  
 Wekî gog li meydana hol û şegan

Dema roj bi derket û dûr ketye reş  
Ji xewa sibê radibû mîr Keleş

Du çavên wî sorin ji ber xîretê  
Wî ban kir Perîşan got:ey hurmetê

Cihê me nema qet li Amed ji bin  
Sibê rojhelat dê ji vir bar bikin

Xidama Kejê pêjinê bû li wa  
Bihîst wê ji wan dê biçin Neynewa

Çi gotin di nav wan de çêbû temam  
Kejê tev bihîstin ji keça xidam

Firotin hemî bexçe û bax û rez  
Hemî xan û eywan hemî mal û rez

Kejê wê şevê qet nebû lê qirar  
Xan û man li wê bûne tûpişk û mar

Diçû,hat li birca belek ew zerî  
Ku çend xêz nivîsand li jora derî

Gelek pir bi xêr hatiye ber derî  
Te daxwaz e dîna heval û zerî

Riya tu li ser bê ji bo te min çav



Li ser bêy ji mal ta bi vir gav bi gav

Memê jar bizane ku çûye te Zîn  
Silêman ji tilya te derket nigîn

Eya dilbirînê bi dax û kewa  
Berê me li şehrê çeleng Neynewa

Were zû li pey me tu şopê bigir  
Rêber bî ji bo te xocayê Xidir

Sibê roj hilat bar kirin bê guman  
Ne pîrê bihîst hem ne hayê Ciwan

Li rehwan siwar bû Keja dilşikest  
Keser da û xatir ji Amed dixwest

Ey Amed bi xatir min îro ji te  
Di pey xatiran ku min tenbî li te

Me hiştî di şehrê te de dost û yar  
Bi roj û şevan tim bi qîr û hewar

Ku bilbil bihar çû dijî mest û dîn  
Ji ber çav ketî ew kulîlka bi bîn

Ku Mecnûn li waran me hiştî tenê  
Û Leyla wî bar kirye êlek dinê

Ji Amed bi der ket Kejê bi koçemal  
Mixabin dilê wê dima cem heval

Sibê rojhelat rabû ser xwe Ciwan  
Berî daye eywan û birc û seran

Sikender berî daye ava heyat  
Biservenebû tarî bû ew welat

Dema hat nik wan serayêd bilind  
Dî ku tê dixwînin hezar bûm û kund

Nêrî kavil e ew sera tê de yar  
Wek eywanê Kesra dîwar maye xwar

Ciwan dest diqetya ji tak û ji tûk  
Li wê rûdinişt ew tenê wek pepûk

Ji nişka nêrî wî li jora derî  
Nivîsandî lê wek me gotî berî

Dema xwend,ew bê hiş kete ber derî  
Ji hêsrana ew ax li ber bû herî

Li ser xwe û Kej her bi nalîn di got  
Kezeb reş fikir, wî li xwe dil disot

Ku ey pertewa cerg û hem can û dil  
Li wara te hiştî tenê dil bi kul

Di pey te me êdî ne sebr û hedan  
Mirin heq dixwazim ji te ey xwedan

Di pey rabû ser xwe helistî piya  
Bi çavên di şil ew ji dil naliya

Berî daye mal poşîman û reben  
Li xwe werdigirt kincê keskeden

Tûrek daye mil têde çar pênc nan  
Bi dewrêşî derketîye dewra cîhan

Dilikumî li kortal û tahtêd kevir  
Ji rêwiya ewî pirsar yarê fikir

Ku carna cihê wî newalên di kûr  
Ji rengê gura wî fikir zûrezûr

Li deşt û çiya geh ew şevder dima  
Doşek qade bû hem lihêf bû sema

Ew û hovê çolan dibûn destbirak  
Li çiya wek firarên ji zulma Dehak

Xerîb û reben ket ber êş û bela

Ji rengê Huseyn teşne yê Kerbela

Ji tahba gerê qet nema tê rewa  
Di pey sê meha ta giha Neynewa

Li şehrê digerya Ciwan bextereş  
Salox wî hila nî ji mala Keleş

Keleş rengê Dara li dar asêgeh  
Abad kirye sûrek li dor wek keleh

Kilît rengê mar e, li jora derî  
Ji tirsî sipahên di Îskenderî

Li hawîr digerya kurê Amedî  
Lê heyf û mixabin tu rê tê nedî

Serê xwe ku hilda li jorê nêrî  
Bi birca belek de bidî ew zerî

Li ber rû ye dest, ew li nik pencerê  
Ciwan ban kirê got: ey dilgawirê

Di pacê re binêre Ciwan va ez im  
Bi jana zirav yê bê derman ez im

Ji eşqa te yarê dîlovan ez im  
 Ji dûra te çavreş bi kovan ez im

Yê tenkuştîyê tîrê çavan ez im  
 Yê dilgirtîyê bend û davan ez im

Xecê tu bizane Siyamed ez im  
 Neçîrvanê kovî li Sîpan ez im

Yê laşkuştîyê derbeîvê ez im  
 Evîndarê keçka silîvî ez im

Nenas û xerîbê welatan ez im  
 Pepokê serê koh û latan ez im

Şahê texteyê serpêhatan ez im  
 Birîndarê koh û xelatan ez im

Welatêm tu yî her ku Xanî ez im  
 Negarim tu yî her ku Manî ez im

Avesta tu yî her ku Zerdeşt ez im  
 Ê Cûdî tu yî her ku ew geşt ez im

Xirabmal û wêranê dîna te me  
Belengaz û pêxwasê vîna te me

Weha got û deng jê bilî ket li wir  
Çi tiştê wî goti tev Kejê guh dikir

Ji nûve Kejê rabû ser xwe helist  
Piyalek bîhok û sêva girt bi dest

Li jorê dibû reqreqê qunderan  
Kejê hate xwarê bi xemla giran

Bi lez hate cem ew bi bejna zirav  
Got:fermo kerem ke Ciwan bigre av

Ciwan wek şahê Hurmizê tacîdar  
Bi destê xwe wîna rijand avesar

Kejê pir girî şermîsar û fedî  
Lê tenha digotê:kurê amedî

Min navê ji te qet ne av û ne nan  
Ji bil dîtina te li ruyê cîhan

Weha got Kejê rûdinişt ew li cem  
Xweşî hatewan derketin derd û xem

Bi guft û bi goyên ku ew dost û yar  
Mijûl bûmbi hev ta ku roj çûye xwar

Kejê rabû ser xwe û got:ey Ciwan  
Cihê xewgeha xwe ji mir bik nîşan

Nîşan kir ji wêre cihê xewgehê  
Ku ew şev bi hejmar ji bîstê mehê

Kejê zû berî daye birc û seran  
Ciwan daye rê çû cihê lê civan

Kejê rengê marê şikeftê civand  
Du şitlê rîhanê ji Kesra re şand

Ewê hin ji êmîş û hin jî te'am  
Kirî sêniyê daye destê xidam

Mifta dergeha sûrê kir paxilê  
Got:bib jê re zû ey xidama Gulê

Bedêlam tu lêke gelek pir selav  
 Bedêlam tu maçî bike herdû çav

Ku nîvê şevê bû bila bête vir  
 Nîşana min û wî reqîna kevir

Serayên Keleş rengê Xan dimdime  
 Xayin ket bi wî re Gula xadime

Gulê wek wezîrê Xanê Çenge zêr  
 Xaîn ket bi wî re ji bo pencî zêr

Bi şahê Ecem re ku da û stand  
 Sipahê Ecem Dimdimê Xan şikand

Heta kurmê darê ne jê bî tu car  
 Ku nayê rizandin û hem kevnedar

Gulê yek nekir du weke babîsok  
 Li ba ket û gerya li wî sûk bi sûk

Wekî heyzebûnê Gulê tax bi tax  
 Digerya li mala Ciwanê neseax



Diket kuçeke tenge tarî û reş  
Dî ku tê dinale Ciwanê nexweş

Sawêra Gulê ket bi çavê Ciwan  
Xweşî hate wî lê nema êş û can

Wekî dîn û hara ji nîşkav qevist  
Bi dîna Gulê ew li qûn rûdinişt

Ciwan gote ehlen gelek merheba  
Kê hid hid çî anî ji min' te ji seba

Sênî daye dest got: bigir dil bi kul  
Ji dermanê Luqman ji destê min Gul

Bigir miftê çerxa bîsta ji ba  
Ziyaret ke Belqîz li şehrê Seba

Xezînê di Qarûn û Îskenderî  
Vebin dê li ber te bi mifta derî

De rabe ey Adem te laş hat bi rûh  
Toba te qebûl kir Xwedê ey nesûh

Ey perwaneyê jar û agirperest  
 Va mûma te vêket li ser kevr û hest

Rivî jê diçî pir bi pêt ûçirûsk  
 Wekî tav û ewran bi birq û birûsk

De rabe bişo dil bi wî agirî  
 Mebe poşîman ger tu yarperwerî

Eger bilbilî va te hatî bihar  
 Gula te li benda te ye xweş li kar

De rabe de rabe Memê dilbirîn  
 Ji çalê bi derkev li benda te Zîn

Dema şev ku zîz bû û jê çûn du par  
 Tu bê deng û pêjin bi lez wer bi xar

Derî vek bi miftê tu wer wêderê  
 Bi nermî kevir lêx tu li pencerê

Nîşana te û yar eve ey bira  
 Me xatir ji te got gelek li ser sera

Gulê rabû ser xwe bi rêket ji cem  
Civî bûn di dil de hezar derd û xem

Êvarê ku zîz bû li wî şev bi reş  
Bi lez wî berî daye mala Keleş

Demek pêjinî kes nedî hişiyar  
Bi kêf û xweşî wî berî dabû yar

Îskender berî daye Dara bi kîn  
Di gel nînecamê di gel dûrebîn

Îskender mekame Ciwan mehneye  
Me daxwaz bi cama belûr mifte ye

Ew marên di xêzên berê de min got  
Li ser der bi heybet weke melkemot

Mekame bi marê li jora derî  
Tu bê şik bizane ey merî

Îskender dema neynika cam belûr  
Vebestî li pêşber ziyaye sitûr

Di mal neynika cam belûrê nerî  
 Kilîşê xwe têde didî ejderî

Ji xwe girt wî heybet ji jorê ve ket  
 Dima termekî bê ruh û can û lebt

Derî maye bê şehne û dergevan  
 Bê tirs der vekir bû bi miftê Ciwan

Memê ketiye baxê emîr Zeynedîn  
 Di çû nêzî paca sera têde Zîn

Şiyarkir ewî Kej bi dengê kevir  
 Gulê rabû ser xwe derî lê vekir

Lingek xiste hundir û yek ma li der  
 Ji bîhn û bexê hiş nema bû di ser

Vexum ya li wî dil ketî der zemîn  
 Ne lebt û ne tevger ne bîhn û ne jîn

Kejê rabû ser xwe bi lez hate cem  
 Bi lingê wî girt û kişand rengê term

Li ser xewgehê ramedand wek mirî  
D u duşek kirin bin lihêf da serî

Çi palasê bircê hemî dane ser  
Xudanê di bin wîre avête der

Demek pir ne çû hişê wî hate serî  
Dî ku Kej li ser wî bi şîn û girî

Kejê ku dema dî Ciwan çav vekir  
Bi lez rabû ser xwe şerabek şekir

Bi wan destê nazik piyala zela  
Dida dest Ciwan got:bigir ey heval

Ku Cibrîl ji ava heyatê dibir  
Cihê tariyê daye destê Xidir

Dema ku vexwarî ew ava zela  
Ciwan rabû ser xwe ne axîn û nal

Gulê rabû ser xwe ji cem wan bi meş  
Derî git li wan wê ji tirsê Keleş

Ciwan û Kejê dîn neman kes li wir  
Dimêtin ji lêvên di hev wan şekir

Li gerden wan dest dikirne xelek  
Nema wan tu hay qet ji bayê felek

Felek xayine pê tu behwer mebe  
Demek rengê roje demek wek şebe

Di wexta ku roje gelek rohnê ye  
We hin car jî rengê şeva tarî ye

Dilê xwe bi wê xweş meke ey merî  
Hevaltî bi kes re ne biriye serî

Bizane ku nade kesî firsetê  
Ne kir dûm bi pêxemberê umetê

Ne kir dûm bi Îsa re zatê ji nûr  
Nekir dûm bi Mûsa re pêxwasê tûr

Yekî wek Suleyman negîn almesî  
Xweda tiştê da wî ne dabû kesî

Xweda daye wî nîmetek pir mezin  
Kirî pêşewayê hemî ens û cin

Kirî serwerê mirx û hov û teba  
Belqiz hate jêre ji xakê Seba

Xweda şand ji wî re bîsatek fireh  
Gera roj û şev pê qonaxa du meh

Gera çerx û perwane û lewleba  
Dolab û perlengeran tev bi ba

Li bala difiryanê bask û neper  
Dikir geşt û seyran ne can û ceger

Ne kir dûm bi wîna re dîsa felek  
Nekir dûm bi Nûh re siwarê kelek

Eya pendegêr tu xwe parêz ke jê  
Xwe wenda meke wek Ciwan û Kejê

Heya hat bi ser wan ve dîsa Keleş  
Di nîva şevê de se'et bûbû şeş

Keleş dî ku herdu di derxulwetê  
Wê gavê hılanê kela xîretê

Berî daye hindir bi kerb û bi kîn  
Bi dest girte şûr wek gurê dev bi xwîn

Ji kalan dikêşa şûrê cewherî  
Di gel gurzê hesin dihat ber derî

Ciwanê reben qet nema wî tu çar  
Ji paca bilind wî xwe avête xwar

Xwedayê diloan li wî kir kerem  
Li ber qade kir bû wekî pembo nerm

Wekî mirxê bazî bi perwaz û fer  
Piy û dest ji wî re dibûn bask û per

Hêdî rabû ser xwe bi axîn û nal  
Bi dîlkî şikestî berî daye mal

Emê wî bihêlin, Ciwan bexte reş  
Dê bên ser Kejê, ka çî pêkir Keleş



Keleş hate hindir, bi çavên di sor  
Bi dest gurz û mertal, weha renga şûr

Bi gulê Kejê girt li pê xwe kişand  
Bi lêdan kela xwe lê wêna rijand

Perîşan bi dengê Kejê hate der  
Bi lez hate hindir, xwe avête ser

Bi çavan ne bû xew, Keleş wê şebê  
Li ser pêtê agir, heyânî sibê

Dema roj bi der ket bi tîrêj û rav  
Li çar goşê dinyê kirî şewq û tav

Peravên xwe berdane kohêde bilind  
Çi deşt û zozan, çi bajar û gund

Ku Hurmiz dibûn padîşahê cîhan  
Ji ber wî şikest leşkerê Ehrîman

Keleş rabû ser xwe bi lez wê sibê  
Bi çavan ne bû xew ebed wê şebê

Xerîb û belengaz û jar û reben  
Serê wî di ber de di xebxeb de çen

Ji fikr û mitala dinê ew merî  
Di hatine girtin li ber her derî

Li ber pêlê fikr û xeyala Keleş  
Cîhan lê dibû tenge tarî û reş

Ji can û ji dil û her ewê xemperest  
Bi roj û şevan wî mirin tim dixwest

Mirin pir dixwazin, Keleş neb' tenî  
Bi dest her kesî nakevê ez benî

Ketî ser zimana, kesî nedgot, xêr  
Bûbû wek benîşt ket devê jin û mêr

Belengaz hemû kes neyarê wî ye  
Lê ew qet nizane sebeb ma çiyê

Belengazê rastgo çî bêtî ku ew  
Hemî kes dibêjin ne wa ye derew

Lê zengîn eger got:çiya çû çirê  
Wekî min gelek jê dîkin bawerê

Dima heyirî ew demek ponijî  
Ji nîşka ve rabû piya sekinî

Berî daye sûkê Keleş pir bi lez  
Di cih de kirîbû kerîk berx û pez

Di gel konekî çar sitûnî b'şerî  
Di gel sing û mîkut,rewage û çît

Bi erzanî wîna firot xan û man  
Ji pez re ewî girtibû yek şivan

Şivan kişkirî pez berî daye mal  
Kejê û diya xwe demek mane lal

Dihatin,dipirsyan ewan herdiwan  
Çi çêbû bihîstin ji xortê şivan

Kejê xweş dizanî tu rê tê nema  
Derê dil vekir bû li derd û xema

Ji çavan dibarin rondik cot bi cot  
Li ser xwe û Ciwanê reben tim digot

Ke ey dil bi derkev ji nêv cerg û ten  
Gelo ka li ku der dijî ew reben

Dema ku te dî lê silav ke gelek  
Tu maçî bikî her dû çavên belek

Tu rûnê binuhrîn bi dengê hezîn  
Bi nazî bibêje eya dilbirîn

Tu bû wek Memê jar ez jî bûme Zîn  
Keleş bû ji mer her wekî Zeynedîn

Ku bextê me bûye neyar wek Bekir  
Dilê me ewî yek demê xweş nekir

Di pey rabû ser xwe Keja bextreş  
Hêsir tene xwarê ji çavên di reş

Dizanî ku wê bê Ciwanê reben  
Nivîsî li jora derî ev su xen

Gelek pir bi xêr pertewa cerg û can  
Li ser çav û gavê tu bê ey Ciwan

Belengaz û jarê evîna min î  
Tu dildar û daxwazê dîna min î

Bi nalîn û fîxan her roj û şeb  
Te sotî li xwe dil, ezim her sebeb

Eger tu dipirsî ji min derd û xem  
Wê xweş bî li te pir birîn û elem

Bi navê Xwedayê cin û her merî  
Birînam ji ya te gelek kûrtir î

Eger xort dinalin bi dengê bilind  
Lê em keç dison dil wekî mûm û find

Hêviya min û te nema ey heval  
Emê bar bikin vê sibê koçemal

Tu Mecnûn î, îro li darê dinê  
Li şûna warê Leylê tu maye tenê

Bihara te lê bû temûz û tebax  
Gula te'y bi bîn çilmisî ew di şax

Ku baxê te hişk bû nema tê rewa  
Bûye war û helîna kund û kewa

Riya me çî dûr e eya dilbirîn  
Berê me li deşta çiyayê Sefîn

Di pey ku xilas kir Kejê rûdinişt  
Bi şîn û girî ewê dil birişt

Anî bû Keleş wê sibê çend şitir  
Qir û qafê malê li wan bar dîkir

Wî koça xwe bar kir di gel konê reş  
Li mêrga Şemamokê danî Keleş

Çî mêrgek fireh tev kulîlk û giya  
Li jêra wê deşt e, li jorê çiya

Ji jora çiyayêd bilind tene xwar  
Gelek şîpên avê ji kanîyên sar

Dema têne xwar bi xumxum û lemlem  
Li rûbarê deştê dibin gol û çem

Çi terş û tirûş û xwedî kon û mal  
Ku vedixun ji wê ava sar û zelal

Hemî hov û mirx û tebayên çîyan  
Dikalin bi sed deng û zar û ziman

Himîn tê ji şêran guvîna piling  
Şîqîn tê ji qazan qêrîna quling

Zûrîna gura, dengê hirç û evor  
Şerê çûçikan, qeqeba kew li jor

Birê koviyan, komê wehş û beraz  
Hawê bilbila, tiqtiqa mirxê baz

Ji şeb ta seher, qet li wan nîne xew  
Di nêv gul-giyan pal didin roj û şew

Biharê ji wan re bihişte çîya  
Hemî çîçek û sorgulîn tev giya

Ku neqşê Xwedê pir bi terz û naz  
Li rûbara dinyê hemî kirye saz

Hezar neqşê Erjeng û Manî hebin  
Nayên der di rewşa gulek sor ji bin

Li jêra çiyê deşteke dûz û pahn  
Cihê xifş û karêd xezalan bizan

Qûtîna şivan, marmara miya  
Mî û berx diçêrin ji tuxmê giya

Çi geysûm û şîh û çi gurt û nefel  
Qewan û kulîlk û rehana du pel

Hemî nihmetin ev qada cîhan  
Xwedê daye terşên ne zar û ziman

Li qûntara çiyayê Sefînê Keleş  
Wî koça xwe danî di gel konê reş

Kejê bûye koçer li deşt û çiyar  
Ji bala wê naçî sawêra Ciwan



Dema Kej berê xwe dida kaniyê  
Li bakûrê êlê di nîvê çiyê

Heta ku diçe, tê bi şîr û girî  
Kela xwe ku hênîk dikê ew zerî

Hêvî û reca xwe birî bû jio bin  
Kulên xwe sipartî Xwedayê mezin

Emê li wir bihêlin Keja bexte reş  
Emê serîkê bidne Ciwanê nexweş

Ewî rojê xweş nedî bû demek  
Gelo kanî paşê çî pê kir felek

Felek xûz û xwar e , ne ol û ne dîn  
Bi kesre ne bûye heval der zemîn

Ku rewrewk e her dem ne av e ne ba  
Kesêl dû tiye, ew bi roj û şeba

Ku rojek ji rojan helestî Ciwan  
Berî daye qonax û birc û seran

Dema ku Ciwan hatibû ber derî  
Nerî ku li ber der dijî yek zerî

Ne Kej bû ne jî wek Perîşan û Gul  
Rûnişt û silav lê fikir dil bi kul

Ewê qenc dizanî ew xortê zerî  
Ne bê kar û îş hatiye ber derî

Nerî ku ewî rêz bi rêz bend bi bend  
Nivîsandina ser derî wî dixwend

Dema xwendî hêstir li rû bûne rêz  
Li wî çog şikestin nema lebt û lez

Ji zeryê dipirsî bê şerm û fedî  
Gelo kanî ma ew xezala kedî

Ewê hê ji nû nas kiribû Ciwan  
Got:ey dilbirînê bi dax û kewan

Eger ku dipirsî ji me kar xezal  
Li deşta Sefînê dijî bê mecal

Gerden xwar e,herdem bi alî te ve  
Bi roj û şevan xew bi çav nakeve

Dema ku zeriye wisa jêre got  
Dil û cerg û mêlak li wî tev disot

Hema rabû ser xwe bi rê ket Ciwan  
Belengaz û birçî,hejar û xizan

Bi rêwîti derketiye dewra zemîn  
Berî daye deşta çiyayê Sefîn

Diket dev newalan li sirtêd bilind  
Di pirsî ewî war bi war,gund bi gund

Gelek tahb cewr û cefa dî li riyê  
Di pê çarde rojan gihaşte çiyê

Dema hilkişî hate jora çiya  
Li mêrgê nerî,êl ji wî ve bû xuya

Li binya xwe dî yek li ser kaniyê  
Bi lez hate xwarê ji jora çiyê

Keja dilbirîna bi dax û kewan  
Ji nîşkava dî ku li hember Ciwan

Dema hev didîn ew diman şaş û lal  
Bi hev re mijûl bûn bi zimanê hal

Hezar tîr reşandin hevdu ewan  
Ji awrên di çavan ji birhêd kevan

Demek mane bê peyv û zar,hişkeçen  
Li paşê li wan der ve bû yeb sixwen

Di gel hev mijûl bûn bi peyv û xeber  
Ku teht û kevîr man li wan lal û ker

Tebayê çiyê,tev li wan ponijîn  
Tilûran per û bask li wan hilçinîn

Ku teyr û tilûr deng bilîne ji wan  
Ne nalîna bilbil ne dengê kewan

Te digot qey çiya xaliye ji her teba  
Ne xumxum ji ava ne guvguv ji ba

Di baxan de sorgul hemî çilmisîn  
Ji darên di şîn ber ji wan tev weşîn

Çiqas ez bibêjim xelas nebe qet  
Bi sed xam û defter, hezar xêz û xet

Ciwan û Kejê ketne baxê evîn  
Ji darên di hev wan gelek gul çînîn

Hezar maç didan hev ewan dor bi dor  
Ji çavên di reş, geh ji dêmên di sor

Ku hingiv dimêtin ji lêvên di hev  
Ji nû hay ji xwe bûn, ku li wan bûye şev

Ciwan û Kejê ku civan dane hev  
Li cihkî nependî digel hev bi şev

Li cem hevdu rûnin û hev bikne bîn  
Û derdên dilê xwe ji hev re bibîn

Kejê rabû ser xwe berî daye mal  
Ciwan jî bi xwe daketî dev newal

Şikeftek li wî cih hebû tar û teng  
Ciwan têde raket di gel wî tifeng

Bi roj nêçîrvan e, li çayê Sefîn  
Lê her şev di gel Kej dike ew civîn

Ku ew dem ji emrê wan nayê jimar  
Ji ber ku bi wan re felek dost û yar

Mixabin felek xayin e, ey merî  
Bi dev dost e, lê ew bi dil gawirî

Xwe mespêre wêna tu carî temîn  
Ne soz û ne bext e, ne ol e ne dîn

Ku carek ji caran ew herdu delal  
Li gel hev civî bûn ne xem û xiyal

Çiya rohnî bû hîv li çarde şevî  
Tîrêjên xwe berdane koh û zevî

Sîpanek ji berfê, ji jora zinar  
Ji nîşka bi ser herdiwan hate xwar

Mixabin ew herdu reben man di bin  
Ne gazî û hewar ne îns û ne cîn

Bi vî rengî herdu mirin bê guman  
Canê xwe sipartin Xwedayê cîhan

Ji darê dinê çûn wekî ew ne bûn  
Bi e'şq û miradê xwe ew şa nebûn

Ku rojek xwe yê xweş nedîn der zemîn  
Di dil wan de ma bû bi hesret evîn

Keleş wê şevê qet nebû lê qerar  
Tu der wî nehêşte ne çol û beyar

Digerya li her cih, nedî bû Kejê  
Sibê hate mal dest birî bûye jê

Diya wê Perîşan dibû dîn û har  
Li çol û çiya wê fikir zarezar

Ku çavên wê sor bûn ji rengê piling  
Ji tahba gerê ew ketî hişkêling

Ne xwarin vexwarin, ne av û ne nan  
Ne lebt û ne tevger ne zar û ziman

Gulê û Perîşan û hem jî Keleş  
Ji bona Kejê wan girêdane reş

Di pey heftekî berf helî bûj' çiya  
Ji nû cendekê herdiwan kir xuya

Şivanan didîn zû xeber dane wan  
Bi bez hatibûn ser laşê herdiwan

Perîşan xwe avêtiye ser Kejê  
Ji şîn û girî deng bil bûye jê

Gulê hate ser term û laşê Ciwan  
Xerîbê welatan û deşt û çijan

Ji nû ve li wan bûye şîn û girî  
Perîşanê hembêz dikir ew zerî

Gelek maç dikir, herdu çavên belek  
Qêrîn jê diçû ta bi çerxa felek



Bi dengê Perîşan çi koh û zinar  
Diman jar û mest tev li ser dost û yar

Bihar bûye payiz li dar û beran  
Teba mane xayiz li ser dîlberan

Çi şalûr û bilbil çi qaz û quling  
Hemî lal û gêj man, ne awaz û deng

Çiqas ez bibêjim, bi zar û ziman  
Dî gel xam û defter, bi nezm û beyan

Hemî tiştê çêbûn nikarim bibêm  
Heta vir me got bes bi kurtî û kêr

Gora wan dikolan li cihkî bilind  
Ne bûn qet li nêz wan ne bajar û gund

Ew herdu veşartin di gor û mezel  
Sipartne ber serê wan du kel

Ku navên di wan xweş nivîsîn li ser  
Ji ser wan diçûn tev bi ax û keser

Ew herdu dibûn serwerê dîlberan  
Dibûn remz,ji bo e'sqa keç û kuran

Bi dîlkî şikestî Keleş bê xelat  
Wî koça xwe barkir berî da welat

Di pey sê mehan ta gîha Amedê  
Heta ew ku sax be Xwedê qet nedî

Nehîşt ku bi hev şa bibin dost û yar  
Bi poşmanî dîsa vegeryaye war

Li vir serpêhatîya me bûye tamam  
Tîrêj pir cefa dî li ser weselam

Gelek hêvîdarim ji keç û kuran  
Hemî jîr û zana,hemî xwendevan

Çi pîr û çi kal û çi mêr û çi jin  
Eger tişkî kêr dîn,veşêrin li min

Tîrêj pêş kirî ev qeder bê guman  
Ji bo hîn bibî kurd bi zar û ziman

Ji bo mîletê xwe me kir ev xebat  
Bijî serfîrazî bijî tim welat

-----  
Rêzkirna tîpan:  
Mişel (bavê Nîsrîn)  
Ibrahîm(bavê Şêrîn)

[www.tirej.info](http://www.tirej.info)